

**ROSA ANA PRADA QUEIPO, SECRETARIA DO CONCELLO DE AMES NA  
PROVINCIA DA CORUÑA.**

**CERTIFICO:** QUE O PLENO DESTE CONCELLO LEVOU A CABO SESIÓN ORDINARIA O 26 DE FEBREIRO DE 2015, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE:

**ACTA DA SESIÓN ORDINARIA LEVADA A CABO POLO PLENO DO CONCELLO O  
DÍA 26 DE FEBREIRO DE 2015.**

No Salón de Sesiões da Casa do Concello de Ames, ás vinte horas (20:00) do día 26 de febreiro de 2015, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde **Santiago V. Amor Barreiro**, e coa asistencia das/os señoras/os concelleiras/os seguintes:

Grupo municipal Popular	Grupo municipal Socialista	Concelleiras/os non adscritas/os
Santiago V. Amor Barreiro Mª Eugenia Martín Vicente Bernardo Moar Míguez Alfredo Taboada Alvelo Ana Ruso Valiña	José M. Miñones Conde José Blas García Piñeiro Mª Isabel González Cancela Begoña Gómez Barreiro Jose Pazos Balsa Francisco Villaverde Marcos	Xosé Anxo Doval Rey Susana Mayo Redondo Mª Pilar Candocia Pita Ramón García Argibay Mª Dolores Fernández Álvarez Manuel J. Ferreiro Santiago María González Gómez Emilio Martínez Carballeira

Non asiste pero xustifica a súa ausencia, a concelleira **Olalla Alvite del Río**,

Asiste o **interventor**, José Antonio Rueda de Valenzuela.

Actúa como **secretaria** a titular da Corporación, Rosa Ana Prada Queipo.

Antes de dar comezo a orde do día, o Sr. alcalde solicita que se garde un minuto de silencio, en memoria do concelleiro recentemente falecido, Alfonso Rey López.

A Corporación posta en pé, garda un minuto de silencio en memoria do concelleiro recentemente falecido, Alfonso Rey López.

A concelleira **María González Gómez** intervén, co permiso da presidencia, para dar lectura o seguinte poema:

*Fiesta transparente de cristal  
oio a chuvia golpeando no tellado,  
en fronte o verde chan, agora mollado  
polas augas copiosas do vendaval.*

*Esta riada de outono, torrencial,  
que ameaza a placidez do meu estado,  
este torrente de lodo desbocado  
esta chuvia desatada e sen final,*

*este día tan chuvioso e tan escuro  
que me some na máis triste soidade*

*moi pronto terá final, estou seguro,*

*porque nunca choverá sen escampar,  
sempre á noite negra segue a claridade,  
só nos compre ser pacientes e agardar.*

A continuación, teñen lugar diversas intervencións que, a petición dos concelleiros/as intervinientes, fanse constar na acta da sesión.

Intervén a concelleira **Mª Pilar Candocia Pita**, que di : O noso pesar polo pasamento do concelleiro Alfonso Rey. Así como agradecemos ao goberno o xesto amable que tivo dedicándolle o acto que se fixo o día de Rosalía, tamén creemos que foi demasiada apresurada a tramitación da súa baixa como concelleiro. Non entendemos por qué foi tan rápida a súa inclusión na orde do día deste pleno, cando estaba case en corpo presente.

Nos, por enriba de todo somos dunha cultura tradicional que respecta os mortos, pero que tamén respecta os vivos. Parécenos que foi unha falta de respecto a el, a súa familia e as súas persoas queridas. Non pode haber nada que teña tanta presa, incluso descoñeza se xa contaban coa acta da defunción como para xa poder tramitalo administrativamente. En todo caso, iso non é responsabilidade miña, sei que os técnicos velaran porque se faga suxeito a lei.

Polo demais, aproveitando que esta aquí a súa familia, como xa dixemos no seu momento, como xa comentamos tamén con outros compañeiros de Corporación, esperamos que se faga un acto cívico de despedida, para que toda a xente que traballou con el, a xente da Cultura, os traballadores e demais, teñan ese momento para con el, como nos tivemos agora aquí.

Intervén o concelleiro **José M. Miñones Conde**, que di: Nos sumamos plenamente ao que se acaba dicir. Todos os que estamos deste lado da bancada non entendemos o por qué desta inclusión na orde do día tan apresurada, e esperamos algún tipo de explicación. Nos sumamos loxicamente ao pesar polo pasamento, e dicir publicamente que o grupo socialista e o partido socialista están a plena disposición dos compañeiros de Pacto X Ames e da familia, á que lle trasladamos, como xa fixemos, o noso mais profundo pesar.

Intervén o **alcalde** que di: Non era intención deste goberno nin desta Alcaldía faltarlle ao respecto a ninguén. Se así o entenderon, pídense desculpas, non era esa a intención. O único que se fixo foi levar a cabo a tramitación do procedemento administrativo, non houbo intención de faltarlle ao respecto á ningún, nin de ofender, aínda que ao mellor podería haberse esperado un pouco mais para incluír este punto na orde do día. Dende o concello fixemos o que tiñamos que facer, como non podía ser doutra maneira, cun compañeiro en activo ao igual que se fai outras veces con compañeiros que xa non están en activo, sexan do partido popular ou non.

## **ORDE DO DÍA**

### **A) PARA DAR CONTA:**

**Punto Primeiro.- Dación de conta ao Pleno da Corporación dos decretos ditados pola Alcaldía dende a última sesión plenaria ordinaria.**

O señor alcalde, **Santiago V. Amor Barreiro**, informa á Corporación que os decretos ditados pola Alcaldía dende a última sesión plenaria ordinaria, estiveron á disposición de todas/os as/os concelleiras/os na Secretaría Xeral, engadindo que o acceso ós decretos é libre para todas/os as/os concelleiras/os, en calquera momento na Secretaría Xeral do Concello, así como nos distintos departamentos nos que foron

elaborados e que ditos decretos foron remitidos por vía telemática ós señores/as concelleiros/as.

## **B) PARA DELIBERACIÓN E ACORDO:**

### **Punto Segundo.- Aprobación, se procede, de actas anteriores.**

Sométense a votación as actas da sesión ordinaria de 29 de xaneiro de 2015 e a da sesión extraordinaria e urxente de 17 de febreiro de 2015.

A acta da sesión ordinaria de 29 de xaneiro de 2015, resulta aprobada por **unanimidade** dos membros presentes da Corporación municipal.

A acta da sesión extraordinaria e urxente de 17 de febreiro de 2015, resulta aprobada por **maioría absoluta** dos membros presentes, coa abstención dos concelleiros Alfredo Taboada Alvelo e José Pazos Balsa, por non ter estado presentes nesa sesión, e o voto favorable do resto dos/as concelleiros/as presentes.

### **Punto Terceiro.- Aprobación definitiva do Plan especial de reforma interior APR PB5-01 do PXOM de Ames.**

(.....)

Rematadas as intervencións, o Pleno da Corporación por maioría absoluta do número legal de membros, coa abstención dos/as 6 concelleiros/as do grupo municipal socialista e dos/as 3 concelleiros/as non adscritos/as Xosé Anxo Doval Rey, M<sup>a</sup> Pilar Candocia Pita e Susana Mayo Redondo, e o voto favorable do resto dos/as concelleiros/as presentes da Corporación Municipal (10), adopta os seguintes acordos:

**Primeiro.-** Aprobar definitivamente o documento refundido do Plan Especial de Reforma Interior, de iniciativa particular, correspondente ao ámbito do solo urbano non consolidado APR P.B5-01 "Conexión Av. Da Mahía-Calle de la Rosaleda (II)" do PXOM de Ames, redactado por Crecente y Fuertes Arquitectos S.L.P., e promovido por D. Manuel Baña Tuñas, D. José Blanco Redondo e Jose Ramon Rey Paz.

**Segundo.-** Publicar o acordo de aprobación definitiva do documento refundido do PERI do P.B5-01 "Conexión Av. Da Mahía-Calle de la Rosaleda (II)" do PXOM de Ames, no Diario Oficial de Galicia, así como a documentación que conteña a normativa e ordenanzas no Boletín Oficial da Provincia de A Coruña, e dar traslado á Consellería competente nos termos previstos no art. 92 LOUGA.

**Terceiro.-** Aprobar a modificación do sistema de actuación proposto no PERI, de xeito que, no lugar de compensación previsto no PXOM para o ámbito, se execute polo sistema de concerto.

**Cuarto.-** Prestar conformidade á proposta do convenio urbanístico de data 14 de xuño de 2013, que foi sometido a exposición pública xunto co acordo de aprobación inicial do PERI sen que foran presentadas alegacións, para a súa tramitación, polos cauces legalmente procedentes, facultándose ao Sr. Alcalde para realización das xestións oportunas para a súa ratificación.

**Quinto.-** Notificar os acordos que anteceden a tódolos interesados, facultando expresamente ao Sr. Alcalde para a realización de cantas actuacións de trámite sexan precisas para a mellor execución do acordado.

### **Punto Cuarto.- Aprobación modificación base de execución do orzamento número 21.**

(.....)

Rematadas as intervencións, o Pleno da Corporación por maioría absoluta do número legal de membros, coa abstención dos/as 6 concelleiros/as do grupo municipal socialista, e o voto favorable do resto dos/as concelleiros/as presentes da Corporación Municipal (13), adopta os seguintes acordos:

**Primeiro.-** Aprobar inicialmente a modificación da base de execución do orzamento número 21, de xeito que esta pase a reflectir o seguinte detalle:

**Base 21. Recoñecemento e liquidación de obrigas.**

O recoñecemento das obrigas, unha vez adoptado o compromiso de gasto, corresponderá á Alcaldía, ou órgano en que este delegue.

Documentos xustificativos para o recoñecemento da obriga.

1.-Todo acto de recoñecemento e liquidación de obrigas basearanse nun documento que acredite o dereito ao correspondente pagamento de terceiro-acredor, considerándose como tales as certificacións de obra, contas de xestión dos servizos, facturas de provedores, convenios con terceiros, a cordos de concesión de subvencións – xuntamente cos documentos xustificativos de aplicación das subvencións outorgadas- certificacións de acordos e resolucións de autoridades administrativas, testemuños de sentencias xudiciais firmes e outros de natureza análoga que tiveran o carácter de executivos.

2.-As facturas serán orixinais e cumpriran as prescricións previstas no Real Decreto 1496/2003 de 28 de novembro, polo que se aproba o Regulamento polo que se regulan as obrigas de facturación, e se modifica o Regulamento do Imposto sobre o Valor Engadido.

3.-Aos efectos do previsto na lei 25/2013, de 27 de decembro, de impulso da factura electrónica e creación do rexistro contable de facturas no Sector Público exclúense da obrigan de facturación electrónica ás facturas cuxo importe sexa de até 5.000 euros.

4.-As certificacións de obras serán expedidas mensualmente polo técnico directos das mesma, axustándose ao modelo facilitado polo Concello ou, no seu caso, pola administración que financia a actuación correspondente. O director da obra expedira certificación mensual dentro dos dez días seguintes o mes que corresponda, e abarcara a obra executada no devandito período, aínda que non existan unidades de obra executada no mesmo; salvo que o prego de cláusulas administrativas prevea outra cousa, a certificación mensual será obrigatoria.

Conformidade previa co recoñecemento da obriga.

A fin de acreditar a realización da prestación ou o dereito do acredor, de conformidade no seu caso cos acordos que no seu día autorizaron e comprometeron o gasto, o recoñecemento da obriga requirira, como tramite previo, que polo xefe do servizo, ou onde este non exista, polo Concelleiro Delegado correspondente, sexa asinada dilixencia de conformidade sobre a mesma factura ou documento de cargo.

A dilixencia a que se refire o paragrafo anterior forma parte da comprobación obrigatoria do investimento para todos os gastos non xustificadas documentalmente con certificación de obras ou actas de recepción de obras, subministracións ou servizos”.

De existir, as certificación de obras ou actas de recepción de obras, subministracións ou servizos, serviran como acreditación do que a obra, servizo ou subministración foi levada a cabo con arranxo ás condicións técnicas que serviron de base para a adxudicación”.

**Segundo.-** Publicar no Boletín Oficial da Provincia o referido acordo de aprobación inicial, inserindo no mesmo o texto integro da base modificada, a efectos da súa aprobación definitiva, no caso de non se presentar reclamacións contra a mesma durante o período de información pública.

**Terceiro.-** Facultar ó alcalde presidente do Concello de Ames, para cantas actuacións de trámite sexan precisas para a mellor execución do acordado.

**Punto Quinto.- Aprobación crédito extraordinario 1/2015.**

(.....)

Rematadas as intervencións, o Pleno da Corporación por maioría absoluta do número legal de membros, coa abstención dos/as 8 concelleiros/as non adscritos/as Xosé Anxo Doval Rey, M<sup>a</sup> Pilar Candocia Pita, Susana Mayo Redondo, Ramón García Argibay, M<sup>a</sup> Dolores Fernández Álvarez, Manuel J. Ferreiro Santiago, María González Gómez, Emilio Martínez Carballeira, e o voto favorable do resto dos/as concelleiros/as presentes da Corporación Municipal (11), adopta os seguintes acordos:

**Primeiro.-** Aprobar inicialmente o expediente de modificación do orzamento “Crédito extraordinario 1/15”, financiado cunha baixa de crédito, de acordo co seguinte detalle:

**Aplicación que cede crédito**

	Importe:
162 227.99	30.000,00 €
Total	30.000.00 €

**Aplicación que recibe crédito**

Á aplicación:	Importe:
132 624.00	30.000,00 €
Total	30.000,00 €

**Segundo.-** Publicar no Boletín Oficial da Provincia o referido acordo de aprobación inicial, inserindo no mesmo o resumo por capítulos da modificación, a efectos da súa aprobación definitiva en caso de non se presentar reclamacións contra a mesma durante o período de información pública.

**Terceiro.-** Facultar ó alcalde presidente do Concello de Ames, para cantas actuacións de trámite sexan precisas para a mellor execución do acordado

**Punto Sexto.- Toma de coñecemento polo Pleno do falecemento do concelleiro Alfonso Rey López e solicitude de expedición de credencial a favor de Ramón Senra Ríos.**

O Pleno da Corporación toma coñecemento do falecemento do concelleiro Alfonso Rey López, e declarada a vacante acorda solicitar expedición de credencial á Xunta Electoral Central, a favor do seguinte candidato da lista na que se produciu a vacante (Partido Popular), que resulta ser Ramón Senra Ríos.

Unha vez recibida a credencial que se solicita, o seu destinatario terá dereito a tomar posesión no primeiro pleno municipal que se convoque, previo cumprimento dos requisitos legalmente establecidos.

Neste momento da orde do día, toma a palabra co permiso da presidencia **Ramón García Argibay**, solicitando que conste en acta a súa intervención a cal é do teor literal seguinte: En nome do grupo que formamos Pacto X Ames, quixeramos dar as grazas a todas as persoas e colectivos que, por un canle ou outro, nos fixeron chegar as súas condolencias e o seu respecto polo pasamento do noso compañeiro e amigo Al-

fonso Rey, Queríamos darlle publicamente as gracias ao Partido Socialista e a Ames Novo, pola súa sensibilidade e por volcarse co home, co compañeiro, co amigo e co político.

Darlle tamén as gracias a outros grupos políticos, como BNG ou Cidadáns que, aínda que non contan con representación plenaria, fixeron chegar o seu pesar cariñoso polo noso profesor. De igual xeito, darlle as gracias a todos os traballadores do Concello, asociacións e veciños que, dun xeito ou outro, mostraron as súas condolencias. Todos estes colectivos e todas estas persoas son a inmensa maioría deste Concello, e iso nunca se esquecerá, nunca.

O que si pretendemos esquecer é a actitude de certos persoeiros que gobernan no noso Concello, cunha actitude que os autorretrata por si soa. Vou a ler dúas definicións da Real Academia. *Mezquino: falta de nobleza e de espírito. Pérfido: desleal, infiel, traidor, que falta a fe que debe.* Estas son unhas definicións do Dicionario da Real Academia Española da Lengua, a ver se vostedes, persoeiros do goberno, se ven reflectidos nestas definicións. Reflexionen.

Queríamos pedir desculpas aos compañeiros de Ames Novo por non votar a moción que trouxeron a este pleno e coa que estamos totalmente de acordo. O noso voto, está vez non será físico, pola nosa ausencia, pero será afirmativo desde o convencemento moral.

Abandonamos o Pleno pola indecorosa actuación do goberno, pola forma de convocar esta sesión ordinaria, coa inclusión na orde do día do pasamento do noso compañeiro Alfonso. Moi boas noites.

A continuación, os/as concelleiros/as Ramón García Argibay, M<sup>a</sup> Dolores Fernández Álvarez, Manuel J. Ferreiro Santiago, María González Gómez e Emilio Martínez Carballeira, abandonan o Pleno municipal.

A continuación o Sr. **alcalde** toma a palabra, solicitando que conste en acta a súa intervención: Aínda que os compañeiros que se acaban de ausentar non están presentes, non podo deixar de comentar a súa intervención. Rexeito e me doe que se utilice de maneira miserable o que aconteceu para descualificar a este goberno e a miña persoa. Teño a conciencia moi tranquila e cualifico a súa actitude de miserable. Se ben é certo que puido haber un erro ou se puido entender como un erro, incluír na orde do día o coñecemento do pasamento do concelleiro, a normativa electoral así o establece.

Dicir publicamente que desde que coñeceu este alcalde de maneira indirecta o pasamento do compañeiro de corporación Alfonso Rey, mantivo unha actitude como debía de manter calquera persoa. Creo que as canles de comunicación do Concello se fixeron eco da noticia, se atendeu a un medio de comunicación que me chamou persoalmente na tarde noite do sábado, se decretou aínda que non hai decreto oficial, porque as cousas as veces hai que facelas rapidamente, do oficial coas bandeiras a media asta durante dous días, luns e martes.

Mantiven unha preocupación persoal coa funeraria, e desde o primeiro momento que me enterei de maneira indirecta da noticia a comuniquéi aos representantes dos outros dous grupos de non adscritos e do partido socialista, vía mensaxe telefónica. Entendiamos que o goberno debía de estar presente no velatorio o domingo e así foi, acudimos ao enterro como non podía ser doutra maneira, e eu mesmo lle adiquei como xa dixo dona Pilar Candocia ao comezo deste pleno, o día de Rosalía en recordo do compañeiro Alfonso Rey.

Se algún quere utilizar isto para atacar ao goberno, volvo a cualificar esa actitude de miserable, con independencia dos erros que puidésemos cometer. Non é intención deste goberno nin deste alcalde, utilizar isto politicamente. Dóeme moito que se actuara desta maneira, volvo a repetir, miserable.



A continuación toma a palabra a concelleira **Mª Pilar Candocia Pita**, que di: So quero insistirle en que cando menos hai unha falta de sensibilidade pola súa parte. Non falo da súa presenza no velatorio porque a descoñezo. Falo de ter incluído este punto na orde do día, e dígollo por unha razón, porque eu recibín a convocatoria o mesmo día que era o funeral.

Eu non fun ao funeral porque como lle expresei á familia, non podía ir porque non tiña quen me quedara con miña nai. Como vostedes saben miña nai esta mal e entre a casa e a tenda non din resolto. Fun alí e estiven con eles e escuseime que non podía ir ao funeral, foron outros compañeiros. En todo caso ese non é o problema. O problema é que iso foi as catro da tarde e eu as seis da tarde recibín na miña casa a convocatoria, o que quere dicir que vostedes fixeron os tramites co compañeiro que o vai suplir cando a persoa estaba de corpo presente. E se non negociaron e non falaron coa persoa que o ía a suplir, canto menos foi torpe a actuación porque non ganan nada, e se negociaron foi de pouca sensibilidade. A min me chamou a atención e me puxo o pelos de punta, mo poría igual se fose vostede ou calquera dos que estamos aquí, porque non é unha cuestión política, é unha cuestión de humanidade. Ser persoa está por riba do que sexamos cada un de nos e das diferencias que poidamos ter, e hai unha liña vermella que nunca se pode pasar que eu intento non pasar e se me equivoco pois terei que dicir que me equivoquei, terei que recoñecer que me equivoquei.

Eu non sei como llo comunicaron ou como llo deixaron de comunicar os compañeiros de PxA ou a familia ou quen fose, pero eu tampouco sei se se pode dar de baixa un concelleiro por morte sen ter a acta de defunción e non sei se ese día xa a tiñan. Dende logo, foi de pouca sensibilidade señor alcalde, e debería de recoñecelo porque é bo recoñecer os erros.

Pense vostede unha cousa, e me inclúo, en política estamos metidos nunha burbulla, e non somos conscientes de mirar para os lados; eu tamén. As veces, estás tan metida na voraxine, no rolo administrativo, que nos esquecemos que detrás dos actos administrativos hai persoas. A min paréceme que, cando menos, vostede debería recoñecer que foi un erro e que houbo cando menos falta de sensibilidade.

Intervén o **alcalde**, para dicir: Xa lle dixen antes que non é intención deste goberno nin deste alcalde amolar ou faltarlle ao respecto a ninguén. É mais, a convocatoria se decidiu repartila despois do funeral, a posteriori, porque entendiamos que ao mellor antes da celebración do acto litúrxico tampouco era de moi bo agrado. A convocatoria de pleno había que facela ese día, pero pido desculpas e entendo que a alguén lle puido molestar, pero non era a intención deste goberno nin deste alcalde ofender a ninguén.

Intervén co permiso da presidencia **Xosé Anxo Doval**, para preguntar se tratándose dun punto de deliberación e acordo, non tería que celebrarse comisión informativa previa para tratar o punto e se hai acreditación administrativa do pasamento.

Intervén a **secretaría**, que lle informa que a pesares de estar incluído na parte de deliberación e acordo, tratase dun asunto que no precisa comisión informativa, que o acordo prodúcese *ope legis*, e que non existe inconveniente legal en incluílo na orde do día xa que se ten coñecemento do pasamento por notoriedade aínda que a documentación administrativa acreditativa terá que ser remitida a administración electoral.

### **C) PARA CONTROL DO GOBERNO:**

**Punto Sétimo.- Moción presentada polos/as concelleiros/as Pilar Candocia Pita, Anxo Doval Rey, Susana Mayo Redondo e Olalla Alvite del Río, o 16 de febreiro de 2015 (núm. R.E. 1713), sobre inadmisión pola RFEF de inscrición de xogadores menores estranxeiros.**

O concelleiro **Bernardo Moar Míguez** anuncia unha *emenda in voce* sobre a moción presentada, que tras ser sometida a votación resulta rexeitada cos votos a favor dos/as 5 concelleiros/as do grupo municipal popular, o voto en contra dos/as 6 concelleiros/as do grupo municipal socialista e das/os 3 concelleiras/os non adscritas/os M<sup>a</sup> Pilar Candocia Pita, Susana Mayo Redondo e Xosé Anxo Doval Rey.

(.....)

Rematadas as intervencións, o Pleno da Corporación, por unanimidade dos seus membros presentes presta aprobación á moción do teor literal seguinte:

*O pasado 16 de decembro a Federación Española de Fútbol resolveu a solicitude da S.D. Milladoiro de inscrición de un xogador “procedente do exterior” menor de 18 anos en razón de que a documentación estaba “incompleta” por faltar o padrón en idioma FIFA, concretamente o certificado de empadramento fora expedido polos servizos administrativos de este Concello. A obriga de presentar este documento ademais de outros moitos recóllese no “Regulamento sobre o estatuto e transferencia de xogadores” da Federación Internacional de Fútbol Asociación e ten a súa orixe en combater o tráfico de menores, norma que dificilmente dirixida á S.D. Milladoiro nin a ningún clube aficionado, moi lonxe de ter a capacidade de captar xogadores no estranxeiro e traficar con eles.*

**O art. 7 do citado Regulamento establece:**

*Idioma dos documentos: Si un documento non está dispoñible nun dos catro idiomas oficiais da FIFA, a asociación presentará unha copia do documento nun dos catro idiomas oficiais da FIFA ou unha confirmación oficial da asociación afectada que resuma os feitos pertinentes de cada documento nun dos catro idiomas oficiais da FIFA. En caso de demora, a subcomisión terá dereito a desestimar devandito documento, baixo reserva do establecido no art.5, apto.3.)*

*Polo tanto é a Asociación, neste caso a Federación Galega de Fútbol e a Federación Española de Fútbol, que teñan a obriga de presentar unha copia do documento nun dos idiomas oficiais da FIFA, dous dos que, por certo, son o español e o portugués, dificilmente pois, non se debía entender o documento cos distintos campos dun documento normalizado escrito en lingua galega. A propia redacción recoñece a posibilidade de que un documento poida “non estar dispoñible nun dos catro idiomas oficiais da FIFA”, loxicamente esta organización non é quen de impoñer o idioma en que unha administración se debe relacionar cos administrados.*

*Temos pois que as Federacións Galega e Española de Fútbol, con un grao de dependencia da Secretaría Xeral para o Deporte e do Consejo Superior de Deportes en lugar de velar polos dereitos lingüísticos dos cidadáns e do dereito ao deporte dos menores poñen pedras no camiño trasladándolle unha responsabilidade que de feito o inhabilita para esa práctica deportiva.*

*Hoxe é o caso de este xogador de categoría infantil, pero en Ames temos e teremos moitos menores que se poden ver nesta mesma circunstancia mesmo na presente tempada.*

**Por todo isto o Pleno do Concello de Ames ACORDA:**

- 1) *Instar á Secretaría Xeral para o Deporte para que se interese diante da Federación Galega de Fútbol e da Federación Española de Fútbol e se libere a ficha de este xogador á maior brevidade.*
- 2) *Instar á Secretaría Xeral de Política Lingüística a que vele polo dereito de que*



*as relacións entre administración e administrado sexan no noso idioma e os documentos presentados en idioma galego ante a Federación Galega de Fútbol teñan plena validez a todos os efectos e non se obrigue polo tanto a presentar ningunha documentación noutro idioma.*

- 3) *Instar á Secretaría Xeral para o Deporte para que, a través das Federacións Galega e Española de Fútbol, demanden á FIFA que non vulnere os dereitos dos nenos nados no estranxeiro á práctica deportiva e modifique a norma para garantir que poidan xogar federados ou, cando menos, que limite esa norma aos clubs vinculados ao fútbol profesional e ás prácticas de transferencia de xogadores que non preservan suficientemente os dereitos dos nenos.*

#### **Punto oitavo.- Rogos e Preguntas.**

Intervén o concelleiro **Xosé Anxo Doval Rey** para formular o seguinte rogo:

**Primeiro rogo.-** Eu creo que ata 3 ou 4 veces demandei do goberno a posibilidade de fraccionar ou de facer os pagos dos distintos impostos, como o IBI e outros, ao longo do ano, para facilitar a economía das familias e permitir levar con mais desafogo eses pagos, que as veces son importantes e se soen concentrar nun período moi corto de tempo. Nun primeiro momento, antes de estar na Deputación, se dixo que por problemas de xestión non era posible. Estando xa na Deputación se me dixo que se ía consultar. A Deputación contempla a posibilidade de fraccionamento. Eu rogo que faga esa xestión, alomenos antes de que remate o mandato, a ver si é posible no segundo semestre do ano fraccionar algún pago.

Intervén o **alcalde**, que di: Tomamos nota do seu rogo e lle daremos cumprida información das xestións realizadas.

Intervén a concelleira **Susana Mayo Redondo** para formular o seguinte rogo:

**Segundo rogo.-** O meu rogo é repetido. Como vostede se garda de contratar aquilo que non pode pagar entón, por favor, páguelle a ANPA de Ventín o que lle deben do autobús de principio de curso, ese que tiveron que pagar os da ANPA para que todos os nenos de Ventín puidesen ser transportados. Xa o pedín noutras ocasións e seguen sen pagar a débeda.

Intervén o **alcalde**, que di: Miraremos esa cuestión.

Intervén o concelleiro **José Blas García Piñeiro** para formular o seguinte rogo:

**Terceiro rogo.-** É un rogo para o concelleiro de obras e para o goberno en xeral. Se podían darlle un repasiño ou polo menos mirar as pistas. Hai moitas pistas que están en bastante mal estado, non toda a pista pero teñen moitos baches. Vou poñer un exemplo claro que ademais xa no seu día se falou del, que é o caso de Guimaráns. Alí hai un bache que esta bastante mal, sobre todo de noite, ademais nese tramo non hai alumado. Pasando o cruce da farmacia, hai un anaco que esta sen pintar e sen luz, ese bache concreto é pequeno. Como ese hai uns cuantos e agora que ven o bo tempo penso que se poden arranxar.

Intervén **Alfredo Taboada** para dicir: Non aguantan nada, bótaslles agora as capas e en 15 días volve a levantarse todo, non aguantan nada.

Intervén **Anxo Doval** que di: Foi o que dixen eu o outro día, botáselle un lavado, haberá que asfaltar e non botar lavados. **Alfredo Taboada** contesta: Non se pode asfaltar agora, Anxo. Continua dicindo **Anxo Doval**: Cantas veces se denunciou aquí

ese bache e segue igual. Contesta **Alfredo Taboada**: hainos a montóns, en todos os lados. Non hai pista que non teña baches.

Intervén o **alcalde**, que di: Aquí en Ameneiral tamén hai.

#### **Preguntas.-**

Intervén o concelleiro **Xosé Anxo Doval Rey** para formular a seguinte pregunta:

**Primeira pregunta.-** Fai pouco menos dun mes solicitei acceso aos convenios que se asinaran cos clubs para o desenvolvemento de escolas deportivas e dos que me enterei na comisión de economía e facenda. Chámame a atención un novo convenio para a escola de patinaxe. Chamoume a atención non tanto polo convenio en si, que o descoñecía, senón polo distinto tratamento que ten cos outros convenios. Os convenios cos equipos de fútbol, voleibol, fútbol sala feminino.... especifican cales son as escolas deportivas, cantas horas imparten, cantas sesións e cantos nenos e en función diso se fai un calculo económico. Pero co de patinaxe non, e non me parece xusto, é desproporcionado comparado cos outros. Non digo que non sexa o que lle corresponde que o mellor o é, pero é desproporcionado comparado cos outros. O que lle quero preguntar é a que responde ese diferente tratamento.

Contesta **Mª Eugenia Martín Vicente**, que di: A lo mejor no esta especificado en el convenio, pero ese dato está calculado de la misma manera que con el resto de los convenios.

Pregunta **Anxo Doval** : Entón, por qué non o recolle o convenio?. Contesta **Mª Eugenia Martín**: No se porque no esta especificado, se le pasó a la persona que lo redactó y a mi cuando lo revisé, también. Ese calculo se hizo y se cotejó y se le dio varias vueltas. Está hecho en base a las horas de clase, igual que el resto de los convenios; en base a las horas de clase, de preparación del campeonato de patinaje, de las horas de preparación del cierre de las escuelas. Quizás no esté especificado, se toma nota para los siguientes, pero el calculo es el mismo que para los demás convenios.

Intervén **Anxo Doval**, que di: Se non está me gustaría que se me pasara unha copia do resultado final deses cartos. Contesta **Mª Eugenia Martín**: Lo busco, no hay problema.

Intervén a concelleira **Susana Mayo Redondo** para formular a seguinte pregunta:

**Segunda pregunta.-** Eu quería repetir unha pregunta que xa fixen. A consecuencia dunhas obras na rúa Alcalde Lorenzo, cambiouse a ubicación da parada de taxis e do bus escolar, situando a parada de bus escolar nun cruce ca Mahía, nun sitio moito mais perigoso para os nenos e as familias. Esta situación foi denunciada por esta concelleira neste pleno en varias ocasións, tamén polos pais e polos monitores ante a policía local. No seu momento, roguei que se volviera a ubicación orixinal pero non se atendeu o meu rogo. Convento o rogo en pregunta, este cambio é provisional?, por qué non se volveu a situación anterior?, hai algún informe técnico?, hai un motivo de seguridade?, hai unha xustificación que sexa técnica e de seguridade?.

Intervén o **alcalde** para dicir: A policía local que é quen coñece as medidas de seguridade vial no concello, me traslada que a ubicación mais correcta é a actual. É unha parada de bus escolar á carón dun semáforo, dun paso de peóns, cunha superficie mais ampla que antes, cuberta co chafrán das vivendas, mais segura. É mais, llo expliquei a algunhas das familias que me atopei.

Intervén a concelleira **Mª Pilar Candocia Pita** para formular as seguintes preguntas:

**Terceira pregunta.-** A respecto das escolas infantís do Concello, van saír as prazas para o vindeiro curso en nada. A pregunta é se a nova escola infantil de Bertamiráns, para a que asinamos unha prórroga do convenio para rematar a súa construción en marzo, vai tamén a ofertar as súas prazas.

E segundo, quixera saber se o concello fixo algunha xestión para que se oferten conxuntamente todas as prazas que hai no concello, tanto de escolas municipais como das da Galiña Azul, evitando o lío de que as familias teñan que facer dúas peticións. Eu pedín que se negociara co Consorcio, sei que é posible a través do convenio que asinamos no seu momento. A pregunta é se se fixo esa xestión ou se pensa facer?.

**Cuarta pregunta.-** Fago nosas unhas preguntas que nos fai chegar a Asociación Animalista Libera: O Concello de Ames ten licitado un servizo de lacería coa empresa Servigal S.L., compañía moi cuestionada noutros municipios por colectivos en defensa dos animais, polo seu escaso interese no desenvolvemento dun servizo pensado na posterior adopción dos animais que foran abandonados por persoas irresponsables. O desenrolo dun programa de fomento da adopción e de convivencia responsable tería que ser unha esixencia moral ineludible de calquera goberno municipal que pense no benestar e na protección animal.

As preguntas son as seguintes: Onde pode a veciñanza de Ames dirixirse para adoptar un animal recollido no municipio?, qué horario ten esa canceira?, cantos animais recolleu o servizo durante os anos 2013 e 2014?, canto gastou o Concello no servizo de lacería durante os anos 2013 e 2014?.

Como supoño que non van a responder agora pido que se nos responda por escrito. E eu engado outra pregunta mais. Había unhas condicións que se puxeron no seu momento para votar favorablemente a proposta que trouxeron vostedes a pleno, unha delas era que se nos ía pasar aos grupos cada x tempo un listado de animais recollidos, canto tempo estiveron na canceira e demais. Eu non recibín nada, non sei se se trapeleou, pero dende logo con regularidade nunca recibimos nada, soamente recibimos o que pediramos expresamente nun momento determinado. Por qué non se fixo?, por qué non se cumpriu con aquilo que se tiña acordado?. Estas últimas son preguntas que engado eu.

Intervén o **alcalde**, para dicir: Miraremos. Eu non teño eses datos e creo que a concelleira tampouco. Creo que no seu momento o partido socialista pediu eses datos, concretamente o ano pasado e se facilitaron. Non hai inconveniente en facilitar os datos.

Intervén **Mª Pilar Candocia**, que di: Había un acordo de que se facilitarían eses datos mensualmente, así está recollido na acta da sesión.

Intervén **Mª Eugenia Martín**, que di: Pues se revisa el acuerdo y se pasan los datos; en todo caso están colgados en la web.

Intervén o **alcalde**, para dicir: Os datos están na páxina web, aínda que as veces non están actualizados.

Intervén **Bernardo Moar Míguez**, para dicir: En canto ao da nova Galiña Azul de Bertamiráns, se prevé abrir un prazo extraordinario de solicitudes e contase con poder abrir a Escola en setembro.

Respecto do tema de unificar as prazas para poder solicitalas todas xuntas, non se fixo porque estamos agora mesmo intentando facer modificacións nalgunha escola para intentar ganar prazas e facer algún cambio mais. Por exemplo, nas dúas escolas infantís do Milladoiro quedan moitas prazas libres de 2 a 3, e estamos pendentes dunha modificación, de sentarnos co Consorcio e intentar negociar un cambio na oferta das prazas e tamén nalgún outro aspecto.

Intervén o concelleiro **José Blas García Piñeiro** para formular as seguintes preguntas:

**Quinta pregunta.-** A primeira é unha que nos chega a través da rede para o concelleiro de obras ou de educación, calquera dos dous podería responder. Leo a pregunta: *Despois de varios anos pedindo o arranxo do aparcamento do campo de fútbol de Milladoiro e do Colexio de Ventín, cando ao final se deciden, mais que nunha satisfacción convertese nun calvario. Catro meses sen poder usar o aparcamento do campo de fútbol, e entre semana tampouco o de Ventín. Cando pensan abrilos?, a qué están esperando?*

Contesta **Alfredo Taboada**: Ao de Ventín fáltalle moi pouco, faltalle algunha valla que estes días xa se coloca, e o do campo de fútbol de arriba esta acabado. En teoría so falta ir a revisalo. Iran os técnicos a velo e se esta ben se abre.

Pregunta **José Blas García**: Tardaran moito?. Contesta **Alfredo Taboada**: Eu calculo que se non hai novidades esta semana quedara listo.

Intervén **Mª Eugenia Martín**, para dicir: Mañana por la mañana vamos.

Intervén **José Blas García**: A pena é que non houbera pleno fai dúas semanas, para ir ao día seguinte. **Alfredo Taboada** resposta: Coincide, me chamaron hoxe.

Intervén o **alcalde**, que di: Fai 15 días lle houberamos dito que o venres 27.

**Sexta pregunta.-** Agora unha pregunta moi xenérica. Eu fai pouco que entrei como concelleiro en Ames, 6 ou 7 meses, e de vez en cando fago un balance da xestión do que fago nos plenos, e pregúntome: vale a pena vir aos plenos?. As veces saco como conclusión que non. Estiven repasando estes días as preguntas e os rogos que fago e o resultado é bastante negativo. Cando facemos preguntas e rogos creo que todo o mundo ten claro que o facemos en beneficio dos veciños e non en beneficio persoal, e me fastidia que rogos, como por exemplo os de arranxo de pistas, como unha fonte en Piñeiro, o dos accidentes de Covas por falta de sinalización, non se atendan. As cousas que rogamos ou preguntamos, moitas veces non requiren case nin inversión. No caso de Covas sería simplemente poñer unha sinal. Outras veces responden que o estudaran e debe ser moi difícil porque pasan os meses e non sabemos nada.

Por qué razón non se atenden algunhas das preguntas e das propostas que fai a oposición, que ademais son doadas?. Pediría por favor que de vez en cando se debatan estas cousas e que non veñamos aquí so a levantar a man, a enfadarnos, como pasa moitas veces, que todos estamos nisto para axudar e colaborar.

Intervén o **alcalde**, para dicir: Moitas veces os rogos se atenden en función da dispoñibilidade e de cuestións técnicas. Ao que di **Blas García**: De 14 que eu fixen soamente atenderon 4.

Continua o **alcalde**: Hai moitos rogos, o número de rogos é bastante elevado. E lle vou dicir unha cousa, se me permite, aínda que leve soamente 6 meses aquí como concelleiro, vostede xa ten unha traxectoria política extensa, de fai moitos anos, xa é bastante veterano.

Resposta **Blas García**: Debe ter unha obsesión coa miña veteranía política. A miña veteranía política como concelleiro de Ames empezou fai 6 meses. Eu non teño dedicación exclusiva no concello, vostedes si, así que vostedes si poden ser profesionais.

Intervén o **alcalde**, que di: Pero a ten no partido que defende, polo cal o propuxeron para aquí. Respeto o seu traballo, creo que o temos falado algunha vez que nos temos encontrado en diferentes actos e sempre mantivemos unha relación cordial, pero anque vostede me bote en cara que so leva 6 meses, vostede ten un certo callo na política.

Intervén **Blas García**, para dicir: Xa que entra neste debate, eu levo 6 meses na política aquí e fago balance do tempo que levo aquí, non fago rogos e preguntas noutro lado. Veño facelos aquí, a vos, que sodes o goberno.

O **alcalde** di: Non diga que non ten experiencia política porque a ten.

E non habendo mais asuntos que tratar, o señor alcalde presidente deu por rematado o acto e levantou a sesión ás vinte e unha horas e trinta e cinco minutos do día 26 de febreiro de 2015, de todo o que eu como secretaria certifico.

Visto e prace

A secretaria

O alcalde